

中國方志叢書·華北地方·第三三七號

據

清 · 宣統元年刊本
清 · 王學伊等纂修

影印

甘肅省

固原州志

三)

成文出版社有限公司印行

中華民國五十九年 月壹一版

固原州志

全三冊

發行人：**黃 成 助**

出版者：**成文出版社有限公司**
台北郵政信箱二二六〇五號

台北郵政信箱二二六〇五號
台北市羅斯福路三段279之二號
電話：三七〇一三二號

印刷者：**東南印製廠有限公司**
和平西路二段70巷83弄29號

內政部登記證內版台業字第一一四七號

新修固原直隸州志

藝文志二

奏疏類

截剿南竄逆回疊勝首逆伏誅疏

國朝總督左宗棠

奏爲官軍截剿南竄逆回疊次獲勝首逆伏誅恭摺馳陳

仰祈

聖鑒事竊陝甘各回麇聚金積堡近因乏食四出竄擾臣前因固原鹽茶廳所屬東西兩山南界平涼北界靈州周數百里回民居其大半中間良匪雜糅亟宜分別剿撫以規久遠遂擬設旌善營令已革壽春鎮總兵蘇如松督之擇良

回軍功馬柏森穆進善李百寬等爲營官各帶土著馬勇
分起駐紮給以薪糧馬乾隨官軍剿捕土匪客匪馬柏森
本萌城回目上年官兵由平涼掃蕩而北固原州黑城子
李旺堡預望城等處回目經官軍剿敗各挈其黨遁歸金
積堡蓋舊奉馬化澂爲宗主者也預望城地勢北接韋州
堡賊由金積南竄必經韋州堡以達預望一過預望則道
路紛歧防剿均費兵力馬柏森者本萌城之良回於時瞰
預望回目馬萬春投入金積堡遂至萌城徙居之斬通逆
小回目而輸誠於官軍截殺逆騎八十餘馬化澂穆生花
恨其倍已又以預望城爲逆回南竄要路必欲陷之嗾馬

正和率陝回馬萬春楊達娃率甘回併圍預望城二月十三日馬柏森飛稟告急記名提督周紹濂及蘇如松由半角城率馬步隊急起援之十五日抵李旺堡十六日黎明由李旺前進甫三十里至馱騾腰線地方遇賊三四百騎周紹濂既督隊分路猛撲斃賊五十餘奪獲騾馬四十餘匹賊奪路狂奔蘇如松率馬隊先抵預望城賊聞官軍大至翻山竄走十七日周紹濂抵預望城則賊竄已遠忽回民走報是夜二鼓有賊千餘將阿布條回堡攻陷殺傷良回李萬梗等現猶踞堡搬運糧物周紹濂急率所部擊之十八日馳抵楊家灣見賊踞對山齊施鎗礮周紹濂督隊

下山鼻水而前飭副將周玉林由中路叅將毛正明由左都司周曙良由右三路併進蘇如松率馬柏森及李百寬等旂善馬隊亦到分兩路抄擊官軍衝上山梁賊亦由山梁下撲鎗礮對轟官軍自下仰攻鎗無虛發連斃執旗悍賊三名紅衣騎馬賊一名賊勢稍卻官軍一齊搶上山梁鎗矛並進斃賊無數賊紛由山旁亂竄適旂善馬隊飛馳而至截斬悍賊數十奪獲賊馬十餘賊向阿布條狂奔官軍躡追及之堡中賊紛出迎拒官軍悉銳衝殺斃賊八九十名生擒二名賊棄堡下溝向老虎灣狂竄馬牛糧食拋棄滿地官軍進至老虎灣始收隊阿布條堡將所獲糧畜

給還難民訊生擒賊目馬生香馬柏壽等知馬正和等圖破預望阿布條等處以擾李旺黑城子官軍運道因官軍速到預望城適賊裹糧已盡遂先陷阿布條擬飽掠後仍回攻預望也周紹濂令馬柏森馳回預望城籌守禦與蘇如松各率所部追賊十九日由欠溝門一帶搜剿而來沿途頗有擒斬賊由王家園莊過河南竄李旺堡是日黎明攻圍李旺堡官營副將李光賓飭存營隊兀立壕口靜以待之賊欺官軍單薄併力猛撲數次李光賓俟其逼近測準轟擊鎗無虛發賊每猛撲一次必傷斃數人乃解圍潰竄李光賓開壁縱擊連斃悍賊二十餘名斃紅衣騎馬賊

目二名訊生擒馬八兒馬元娃供稱賊目一白姓一帥姓
皆馬正和所帶東頭悍黨也是夜三鼓賊分股竄至黑城
子南三十里攻破何家溝良回何家位寨二十日黎明李
良穆率所部馳擊甫近何家溝接總兵張大雄都司周曙
良報賊之大股經李旺擊敗並竄黑城李良穆急掣隊回
剿行十餘里見賊已越黑城十餘里而來似圖與何家溝
賊合隊李良穆帶所部由山橫截而出奮威衝殺賊駭懼
失措紛紛潰走官軍乘勢壓擊斃賊甚多其何家溝一股
自後衝出敗賊復回其抗拒李良穆率部搶入土堡一紅
衣賊衝進堡門揮刀斬之又有紅衣騎賊領悍賊繼至經

排礮轟斃賊始大潰官軍乘勢掩殺收隊回黑城子一面
飛馬邀總兵張大雄都司周曙良前來會剿是夜三更賊
折回北竄一股仍竄回東山二十二日子刻張大雄周曙
良自李旺堡馳至中途遇賊賊見官軍至紛紛潰竄擒斬
數十名昏夜未便窮追天明李良穆帶隊繼至則賊蹤已
遠搜獲落後賊李來娃子及趙三庚等僉供馬正和於二
十日接仗時猝中礮子自鼻梁穿入腦後透出當經賊夥
用綢旗裹抬逾時氣絕其弟僞元帥馬魁同時轟斃良回
柯大有等所報亦同提督徐占彪在韋州花子台一帶截
剿馬正和敗回一股生擒逆賊馬世英等均供馬正和頭

受鎗傷氣絕臣昨提訊李來娃子供詞尤爲確鑿是逆首馬正和伏誅已無疑義此周紹濂所部五營急援預望城保固要地截剿陝甘南竄逆回疊獲勝仗逆回馬正和伏誅實在情形也當賊之圖預望也臣檄黃鼎所部升用提督徐占彪率步隊三營馬隊一營馳往援剿黃鼎更以步隊兩營益之二月十六日由固原拔行十九日抵預望城是日午刻馬柏森報有賊目李花喜馬有全蘇文舉李德隆率賊千餘出金積堡竄出鞏州過下馬關盤踞距預望城四十里之吳家腦徐占彪等卽於是夜蓐食潛師夜起黎明行近吳家腦見該處峯高路狹非用衆之地總兵陳

玉春趙興隆叅將林定遠等飭馬柏森前行引路由王家山黑溝繞道抵虎家山麻兒灣設伏以待徐占彪率兩營逕捕吳家腦賊甫驚覺徐占彪麾軍縱擊斃賊百餘名擒賊六十餘名賊紛向虎家山敗遁徐占彪率陳春萬猛躡之甫抵虎家山陳玉春自山後截出林定遠由左趙興隆由右兩面抄來將全股賊衆裹在中央各營縱橫盪決馬柏森亦下馬步戰立將賊目蘇文舉擊斃生擒賊目李花喜馬有全并擒賊目鎖保鳳蘇成功馬海望李保成馬有保李有俊蘇成明馬得印等及悍賊七十餘名轟斃餘賊二百餘名墜巖死者無數奪騾馬五百餘匹是夜派隊搜

山復獲賊四十餘名斬之二十一日收隊回預望城訊據賊目李花喜馬有全等供奉馬化澂穆生花命率領五營於十六日由金積堡竄出走韋州下馬關至預望圍攻堡寨併探路徑如無大兵阻截即率股分途赴陝擄糧現飭解營審訊此股賊目祇李德隆一犯漏網餘賊逸出者亦無幾矣二十二日馬柏森報稱馬正和一股經官軍痛剿敗歸金積堡已竄近下馬關二十三日徐占彪督步隊五營追之已刻抵下馬關見地勢平衍即結方陣前進行十餘里遇賊各營奮威衝殺賊不能當紛向韋州敗遁追近韋州六七里殺悍賊五十餘名奪獲騾馬七八十頭是夜

訶賊屬聚花子台徐占彪以三營扼韋州堡自率兩營及馬柏森旌善馬隊潛起襲之賊倉卒不知所爲駭懼紛竄官軍乘勢掩殺斃賊無數生擒悍賊十二名奪獲騾馬六十餘頭此徐占彪截剿金積堡南竄甘回殲除殆盡及截剿馬正和敗殘陝回獲勝實在情形也其定邊環慶兩路竄擾陝西各股近由慶陽鎮原預望一帶北竄歸巢均經各軍各營隨時隨地次第截剿斬獲頗多容俟確切察明再行馳報所有此次截剿金積堡南竄陝甘各回殲除首逆最爲出力之記名提督法什尙阿巴圖魯周紹濂應請旨交部從優議敘督帶旌善馬隊已革安徽壽春鎮總兵捷勇

巴圖魯蘇如松請

旨開復原官留於甘肅補用升用提督哈西巴巴圖魯徐占彪擒斬賊目多名力保預望城要地厥功甚偉應請以提督記名遇有提督總兵缺出儘先開列請

旨簡放記名總兵李良穆陝西肅清案內擬請勇號續於迎剿崔禹等逆竄擾半角城時護糧赴營中途遇賊堵擊一晝夜克獲大捷身受重傷茲復以寡擊衆陣斃首逆馬正和實屬異常出力應請

旨賞給清字勇號並

賞加提督銜其餘出力將弁勇丁可否由臣核明擇尤保獎出

自

天恩此次出力回目軍功馬柏森穆進善李百寬王益萬等確
偵賊蹤導引官軍克獲全勝助剿殺賊勞績卓著本應隨
摺請

獎因從前疊經領兵大員賞給功牌職銜均未敘

奏容俟查明核奏請

旨破格優獎以示激勸謹據實馳陳伏乞

聖鑒訓示施行

各軍追剿零賊平慶鹽固一帶肅清片

國朝總督左宗棠

再中路各軍剿捕西北逸賊獲勝情形臣已於七月十二

日馳報並聲明馬彥濫狗齒牙尙未就殲仍飭確探追捕在案嗣據固原提督雷正綰牘稱據管帶旌善營都司穆進善稟報八月初四日突有賊竄入北山穆進善會同民團乘夜擊之斬馘多名賊敗走三營雷正綰查係馬彥濫逆股當派左營提督陳義馳赴東山繞前截擊親率馬隊向北路追剿副將郎永清總兵李廣珠各率馬步繼之初十日追至毛渠井揮軍急擊陣斃悍賊二十餘名奪獲馬十餘匹正收隊間忽有另股步賊從山溝衝出郎永清挺身抵拒鏖戰半時李廣珠陳義趕到併力夾攻賊受重傷而逃十三日據叅將李積慶稟同心城附近之李家岡有

馬賊百餘竄過丁家二溝強營總兵易元壽率隊迎剿訶賊至亢家灣是夜三更乘賊睡熟直前撲入殺十數人賊驚起格拒混戰逾時賊敗潰竄投山澗計殺賊五十餘名落巖死者不計其數奪獲騾馬五十餘頭刀矛器械百餘件官軍陣亡一名受傷十名而已據擒賊馬五娃供首逆金明忠楊百成由河州分出欲在米包山盤踞再竄東山等情訊畢斬之此雷正綰一軍進剿竄賊實在情形也賊敗後潛與馬狗二逆合投賊黨復添十三日由馬房川竄環縣之二十里溝環捷營副將王楚仁聞報恐賊內竄不及調隊卽率親兵百餘人敗賊於途乘勝追殺六十餘里